

Aisciuda Ladina: familia, fech de identità

Dai 5 ai 10 de mé vegn endrezà la 11^a edizion del festival del lengaz e de la cultura ladina endrezà dai Servijes Linguistics e Culturèi del Comun general de Fascia

Aisciuda Ladina - L'é endò beleche ora de l'Aisciuda Ladina, l festival del lengaz e de la cultura ladina metù a jir dai Servijes Linguistics e Culturèi del Comun general de Fascia.

I fies, per prum, e dapò la mères e i pères che rapresenta l cher de la comunanza, descheche vegn conscidrà la familia, l'é i protagonisc de chesta 11^a edizion che sarà dai 5 ai 10 de mé che vegn.

L festival del lengaz chest an l'é out ai bec desche prumes sogec che sparpagnea fora l lengaz de gra a la scola. L'é apontin la scola, tras la politiches linguistics metudes en esser te chisc egn te Fascia, la fojina de la cognoscenza e del sparpagnament del lengaz de mendranza. La joena generazions no l'é demò la miora destinàteres per tor ite con consapevoleza n saer, con lengaz e cultura, e donca l'identità, ma l'é enche chi che dapò a l met de ge l passèr a si fies e de l mantegnir vif tel davegnir. Se i fies l'é i portaousc de l'idiom e de la cultura ladina, i pères e la mères i pel, tras i bec, renovèr sia cognoscenza se i é fascegn de naa opuramenter, se i stèsc te val ma i rua da foravia, descorir sia ricchezza e se fèr ite coscita te la comunanza. Ence i giaves, desche te etres momenc de la vita, i à na funzion fondamentèla



L placat de l'Aisciuda Ladina 2019.

per ge passèr ai nec saeres e valores. L'Aisciuda Ladina l'é donca na ocassion per duc i componenc de la familia de se meter a confront con sia reijes o de emparèr zeche da nef e da enteressant. Se troon te n moment

olache l ladin l'é descori e portà a cèsa dai bec che i doventa a chesta vida paladins de n lengaz e de na identità che podarà jir inant demò se la neva generazions seghita a l'emparèr, a l'aprijèr e a l sentir sie te la vita de ogne di.

Anter la tropa ativitèdes del festival, endrezèdes soraldut te la scoles de Fascia e te la scolina con enche magnadiva tradizionèla, cater l'é i evenc più emportanc da no perder.

Ai 5 de mé sun Sela

Se taca ite en domenica ai 5 de mé con na raida sun Jouf de Sela. Tel cedeand da canche, ai 5 de mé del 1920, l'é nasciù la bandiera dai 3 colores,

simbol de l'unità di Ladins, l'Union di Ladins de Fascia envia duc sun Jouf de Sela per cognoscer mingol de storia de nosp popul ladin e de sia bandiera. Vegn endrezà na coriera che ponta via da les 14.30 te piaz de

l'Istitut cultural ladin per esser sun Sela entorn les 3 domesdi. Per se emprevaler de la coriera ge vel se scriver ite alò da l'Union di Ladins de Fascia dant dai 26 de oril al nr de telefon 0462 764545 o a la mail union@ladinsdefascia.it.

Ai 6 de mé te Sorastanza de la Scola a Sèn Jan

En lunsch ai 6 de mé da les 17.30 te Sorastanza de la Scola Ladina a Sèn Jan l'é l'inaudazion de l'Aisciuda Ladina con la prejentazion del program, curt concert de chi che à tout pèrt al cors "Ciantèr ensema amò più bel" e n confront anter la generazions su la दौरa del lengaz de mendranza dal titol "Canche l ladin ne tegn adum". Se sera sù con n "Apericena" endrezà da la Coprativa Oltre col Proiet "Cojinèr ensema". Per tor pèrt ge vel se scriver ite dant dai 30 de oril al nr de telefon 0462 764500 int. 4.

Ai 9 de mé te Museo Ladin

En jebia ai 9 de mé da les 17.30 te sala Heilmann del Museo Ladin de Fascia vegn fat la prejentazion del nef liber "La pazienza di sasc" con la autora Ierma Segà e la dessegnadora

Michela Molinari. Vegn metù fora i dessegnes originèi del liber e vegn portà dant enche na dramatisazion del liber a cura de la regista Loretta Florian di Servijes Linguistics e Culturèi del Comun general. Duc chi che tolarà pèrt a la prejentazion ciaparà en don la publicazion. Ence chiò ge vel se scriver ite dant dai 30 de oril.

Ai 10 de mé te Caserma di Studafech via Vac

L'Aisciuda Ladina se sera sù con n domarena de jeghes a squadres anter families con la colaborazion e l'animazion del grop INOUT. En vender ai 10 de mé da les 16.00 a les 18.00 alò da la Caserma di Studafech via Vac duc i bec de la scolina e de la populères podarà tor pèrt ai jeghes da n'outa e da anchecondi ensema con sia families. A duc chi che tol pèrt Bertol ge à endrezà n bel don originèl. La zedoles de ensinuazions vegnarà toutes sù te scola opura les pel vegnir portèdes te ofize di Servijes Linguistics del Comun general de Fascia dant che sie fora i 8 de mé.

Te la setemèna de l'Aisciuda Ladina vegn envià duc a meter fora la bandiera ladina. Se pel la comprèr te senta de l'Union di Ladins a Sèn Jan, strada Dolomites 22. (mci)